

Basola umnikazi wepulazi ngemfuyo ebulewe

SIMPHIWE NGUBANE

AKHALA ayazithulisa amalungu omphakathi waseGlendale, eNdwedwe, asola umnikazi wepulazi ngokubulala imfuyo yawo ngoDisemba nyakenye okuze kube yimanje akathathelwe izinyathelo zomthetho.

Amalungu omphakathi amane azifikele mathupha emahhovisi eSolezwe ezobika usizi lwawo. Abebalisa engaphezi ngomnikazi wepulazi abathi walalisa uyaca ngenhlamvu, wasasazela izimbuzi, isiklabhu nenkomo ngezinja zakhe ngoDisemba 28 ngoba ethi le mfuyo igcwala epulazini lakhe.

Ilungu lomphakathi, uMnuz Sikhumbuzo Mhlongo, lithe ikhansela, amaphoyisa nenkantolo babaholele ophathe ngoba abasizakali kuze kube yimanje.

“Saya emaphoyiseni athatha izitatimende abe esesikhomba enkantolo. Besigqigqa inkantolo kwaze kwafika isikhathi lapho kuthiwa asizihlanganisele khona o-R400 umuntu ngamunye obulawelwe imfuyo ukuze sikhokhele isikhonzi senkantolo imali yokwenza umsebenzi waso. Kwasidida lokho ngoba uhulumeni okumele akhokhele isikhonzi senkantolo thina asinamali. Imfuyo ebulewe besidla ngayo siyidayisa. Ikhansela libamba liyayeka lithi kunendlela elulusebenza ngayo lolu daba,” kusho uMhlongo ngokukhathazeka.

UMhlongo ukhala nangokwe-nzelwa phansi yinkantolo iSmall Claims Court ababika kuyo udaba lwabo.

Bebephethe namaphepha awubufakazi bokuthi bazibikele

iziphathimandla zikaMasipala waseNdwedwe ngalolu daba ngenyanga edlule kodwa akukho okwenzekayo ukuze bathole imfuyo yabo kuboshwe umsolwa.

Ikhansela lakule ndawo eku-Ward 3, uMnuz Mduduzi Cele, lithe lize labikelwa uzakwabo oyikhansela ngalolu daba. Lithe abantu abalinyalelwa yimfuyo noma amalungu omphakathi abakaze balitshela lutho.

“Kuyiphutha ukuthi akukho zinyathelo zomthetho ezithathiwe ngomsolwa ngoba amaphoyisa ayalusebenza udaba. Akekho noyedwa umuntu owangithinta kwabalinyalelwa yimfuyo engazisa ngodaba. Kunabantu abangangifuni njengekhansela labo emphakathini abangasoze bangamukela engibona ukuthi sebesebenzisa lolu daba ukungcolisa igama lami ukuze ngibukeke njengomuntu ongawukhathalele umphakathi,” kuchaza uCele.

Ukuvezile nokuthi wawathinta amaphoyisa ezama ukuthola ngalolu daba nokuyilapho atshelwa khona ukuthi akhona amacala asevulelwe umsolwa.

Okhulumela amaphoyisa esifundazweni, uColonel Thulane Zwane, usiqinisekisele isigameko wathi likhona icala elivuliwe lokubulawa kwemfuyo engu-19 eyadutshulwa yayasazelwa nangezinja.

Uthe bekungakaboshwa muntu amaphoyisa ayaqhubeka nophenyo.



ASIKHULUME

THUMELA umbono ngalolu daba kuFacebook (Issolezwe), kuTwitter (@isolezwenews) noma umqhafazo ku-45773. I-sms ibiza R1,50.